

Opitz, Martin: Chansonnette (1624)

1 Mit Liebes Brunst behafftet sein/
2 Ist warlich eine schwere Pein/
3 Es ist kein Schmertz auff dieser Erdt/
4 Der recht mit jhm verglichen werdt:
5 Drumb will ich mich gantz embsiglich
6 Von dem Leyden allzeitscheiden/
7 Vnd die süsse Gifft vermeiden.
8 Auff daß nun nicht die schnöde Brunst
9 Mich lasse zu jhr tragen Gunst/
10 Soll Venus mich nicht treffen an
11 Auff jergendt einer Liebes Bahn/
12 Der Tugendt Weg ist ein schön Steg/
13 Darauff eben ich will schweben/
14 Vnd jhr gantz verpflichtet leben/
15 Recht vnd gar wol auch Pallas blieb
16 Allzeit befreyet von der Lieb/
17 Sie gab dem Fewer niemals raum/
18 Vnd hielte sich in stätem Zaum/
19 Auff grüner Heyd sie allezeit
20 Mit dem Hetzen sich thet letzen/
21 Vnd frey aller Sorg ergetzen.
22 Ich will ins künftig fleissig auch
23 Nachfolgen dieser Göttin Brauch/
24 Denn Venus ist die gröste Last/
25 Cupido ist ein schädlich Gast.
26 Wen er einmal nur bringt zu fall/
27 Muß verderben/ offt auch sterben/
28 Vnd für Frewden schmertz ererben/
29 Also belohnt er alle doch/
30 Die sich ergeben seinem Joch/
31 Vnd diß bedenck ich offt vnd viel/
32 Es mag lieb haben wer da will/
33 Ich bleibe mein allzeit allein/

- 34 Offt nach schertzen kommen schmertzen/
35 Wohl dem der das thut behertzen.

(Textopus: Chansonnette. Abgerufen am 23.01.2026 von <https://www.textopus.de/poems/10623>)